

欽定剿平粵匪方略

欽定勦平粵匪方略卷一百五十三 丙辰年

五月初二日 戊午 和春福濟奏言查徽州

婺源祁門兩縣與江西接壤前月逆首石達開
率領大股由樂平浮梁德興三路分竄當經革
任江西巡撫張芾札飭都司封九貴等嚴守要
隘從九品張琪等帶勇馳赴婺源豫飭從九品
程守謙等往堵婺休接壤之五嶺並飛調參將

周天受自崇覺寺馳回漁亭接應祁門浙嶺兩路之兵復派浙江候補府經歷縣丞王桐等游巡各路三月初七日賊竄婺源縣之中雲知縣楊裕仁督團迫擊斃賊多名賊知縣城有備卽繞由江口一帶竄入五嶺十二日知縣唐寶昌千總歐陽彬等扼賊於新嶺遇賊接仗自卯至未殺斃百餘名賊退嶺外十三日賊竄休甯之

屯溪初門之賊分股竄至七里橋周天受由漁
亭進至花橋遇賊接仗殺斃長髮賊數名餘匪
數十名賊始敗遁張芾親帶壯勇數百名扼紮
西門外之七里亭令周天受會各路兵勇至七
里亭紮營二十二十一等日進攻屯溪賊不敢
拒山歙縣之西溪奔赴潛口我軍自佛子嶺追
至楊干地方賊分兩股一至吳家林楊村一至

吳坎許村經鄉團圍攻周天受等合力鏖戰斬
逆首六十七級生擒五十四名餘賊竄出箬嶺
祁門之賊亦被擊退逃出羊棧嶺現在徽州府
境一律肅清張芾倉卒布置悉合機宜尙屬著
有微勞惟曾任大員應如何給獎恭候

聖裁五品頂戴歐陽彬六品頂戴把總程朝貴六品頂
戴紳董程懋恩曹元振葉邦本葉星若力戰陣

亡應請

飭部從優議卹奏入

上諭內閣曰本年三月間逆匪竄擾徽州府屬之婺源祁門兩縣當經張芾分派兵勇勦擊疊有斬擒鄉團合力助戰斬馘尤衆賊由羊棧嶺竄逃徽州境地肅清六品頂戴前任江西巡撫張芾著賞給五品頂戴陣亡之五品頂戴千總歐陽彬六品頂戴把總程朝

貴六品頂戴紳董程懋恩曹元振葉邦本葉星若均
著交部從優議卹

初三日己未山東道監察御史方濬頤奏言臣聞

江南裏下河七州縣素稱產米之鄉現在江南
北軍民所需皆取給於此賊匪復陷揚城忽來
忽去意似不在踞城而在擄糧刻下三汊河雖
已收復誠恐各營將士日久懈生不可不嚴加

整頓儻六牖仙女廟等處再有疏虞則七州縣甚屬可危南北兩路河道必至梗塞應請

旨嚴飭領兵大員加意防堵或添兵勇或連莊保較從前倍加嚴密則不必籌餉道而自無轉運之勞不必議屯田而自無乏食之患再由仙女廟至泰州約二百餘里爲裏下河往來要路泰州四鄉千河萬港不通旱路相傳宋臣岳飛駐軍於

此其支河汊港俱照陣圖挖成河道極多曲而
且窄外河船隻不能知其路徑明時備倭寇亦
在泰州北鄉港口鎮一帶爲篙子會無事在河
港寬處操練有警則各港小船飛馳而出使賊
不知我軍多少歷觀宋明以來皆於此處屯兵
防禦現值賊氛未息不得不爲久遠之謀亦應
請

旨飭下領兵大員倣照辦理

方濬頤又奏言已革江蘇藩司雷以誠現經奉旨拏問交德興阿查辦第恐德興阿所奏各款尙有遺漏臣聞雷以誠軍營凡勸捐釐捐畝捐等事名爲籌餉實則營私所委司收發各事者爲以誠之胞姪雷鳳翥又名雷儀甫女婿黃鍾及吳雲翁壽慶虞詠齡悉其私人衆稱之爲五虎偪令

捐戶寫立不願請敘字據派民守牆迫使按日以錢自代所發之餉每百文必扣三十文到處售賣功牌每張收番銀二三十圓吳雲虞詠齡有迫脅陣亡中書鍾淮之子鍾毓麟詐去紋銀千兩之事黃鍾有鎖禁楊壽壩村民吳姓責打霍家橋武生常姓之事並有吳雲所委鹽大使陳壽椿在黃珏橋勒詐湖廣職員讓鑄番銀百

圓致令自盡而其釐捐之錢復濫及空船畝捐
之錢幾四倍於錢糧至伊壻黃鍾竟置田產於
北鄉方家巷一時營中員弁貪婪暴虐坐擁厚
貲無非其爪牙羽翼民不聊生人人側目遂致
三月初一日賊匪乘隙來攻兵勇全行潰散相
應請

旨將雷以誠委用各員一併交德興阿秉公查辦奏入

上命軍機大臣傳諭德興阿翁同書曰御史方濬頤奏江南裏下河七州縣素稱產米之鄉賊匪意在擄糧宜嚴守要隘以裕軍餉泰州爲裏下河往來要路河港曲窄宋明以來皆於此處屯兵防禦請飭倣照辦理等語著德興阿翁同書悉心酌覈設法嚴防以保完善另片奏雷以誠軍營委員雷鳳翥黃鍾吳雲翁壽慶虞詠齡皆雷以誠之私人衆稱爲五虎其勸捐

發餉等事種種營私索詐甚至有勒逼釀命情事著
德興阿等按照所叅各款提集該委員等一併歸案
嚴行審訊毋得稍有不實不盡

初五日 辛酉 葉名琛柏貴奏言江西逆匪竄擾瑞

袁臨吉撫建等府及泰和萬安各縣贛州以下
匪徒尙在十八灘內之良口地方南安府所屬
南康縣之潭口聚有匪徒數千人大庾縣之新

城地方匪徒現竄至青龍墟滋擾查南雄州東北一帶緊接江境該處情形緊急當卽飛飭署南雄州知州孫福謙雇募練勇一千五百餘名並添雇東莞勇三百餘名派令從九品孫福同等帶赴南安一帶援剿其始興仁化連平和平等處皆與江省毗連並飭各該文武分督兵勇在交界各要隘加意嚴防奏入報

聞

初六日壬戌德興阿翁同書奏言據署江浦縣知

縣曾勉禮稟稱二十五日未刻有賊船百餘隻
駛泊老西江口等處登岸向西南兩路奔來撲
城該縣督勇登陴守禦千總藍新恩帶勇由北
門繞南迎擊總兵薩炳阿帶兵出城該縣連開
槍礮擊斃賊匪十餘人賊勢稍卻因卽飛請薩

炳阿應援連催三次未見發兵接應該縣及藍
新恩拒戰多時該逆復分路撲犯衆寡不敵各
勇傷亡甚多卽於戌刻縣城被陷等語臣等接
閱之下不勝駭憤查上游賊船麕聚北岸向榮
所調吳全美等師船迄無抵老西江口消息而
賊已由彼登岸撲擾薩炳阿以派防總兵大員
賊至帶兵出城何以該縣請援不至必須確查

究辦應請

旨將總兵薩炳阿卽行革職聽候查辦署江浦縣知縣
曾勉禮先行革職仍責令帶罪自效若查有退
避重情仍當據實嚴叅在城文武下落查明再
行具奏昨已由儀徵添撥穆克登額馬隊一起
馳赴浦口會同安勇富春等設法進攻又揚營
派撥營總博奇馬隊一起赴浦助剿迅圖克復

德興阿翁同書又奏言自三汊河賊巢埽平後
餘匪遁回瓜州臣等連日派兵在東西兩岸之
四里鋪等處搜剿臣德興阿等親督官兵由東
路進攻總兵鞠殿華等向紅橋尹家橋進攻已
革總兵松齡等向蕭莊進協領富明阿等向四
里鋪進臣等以向來攻賊每接一仗卽行收隊
此次向東攻進其西路勢必稍鬆復督飭馬步

隊由西岸馬橋商橋一帶設伏另由四里鋪進
攻上瓜州賊營並飭東岸官兵同時攻中瓜州
以分賊勢該逆突出三四百人前來抗拒我軍
鼓勇直前斃賊三十餘名伏兵齊起攻擊賊遂
不支紛紛敗退我師跟蹤追勦撲入外濠因木
椿竹籤太密又兼時已昏黯亦卽收隊臣等議
以嗣後進攻必東西兩軍齊進俾該逆面面受

敵不令息喘惟步隊究嫌過單直隸兵截留徐
營屢催不遣請

飭下邵燦庚長檄飭直隸兵迅速來揚並將吉林黑龍
江餘丁五百名一體催令趕來揚營以資助剿
奏八

上命軍機大臣傳諭德興阿翁同書曰賊匪竄至江浦
城池被陷該處地關緊要著德興阿等派撥精兵前

往攻勦務將該縣城池剋日收復毋任逆衆久踞至
與江浦毗連之六合儀徵等處並著德興阿等飭令
總兵李志和等嚴密防堵勿令賊蹤蔓及致干重罪
瓜州一日不復則江北一帶不得休息德興阿等所
奏攻勦情形尙屬毫無把握該大臣等身膺督師重
任務當申明紀律使將弁兵勇咸知奮勉將瓜州賊
巢迅速攻毀毋得老師糜餉自取咎戾

上又命軍機大臣傳諭邵燦庚長曰逆賊攻撲江浦縣城失陷瓜州死黨連被官兵圍攻竄伏不出我軍步隊過單未能直擣賊巢揚營需兵十分緊急著邵燦等卽將已抵清江各省官兵及吉林等處餘丁遵照厯次諭旨分撥啟行剋期馳赴揚州毋再遲延

上諭內閣曰江浦縣城經官軍克復後德興阿等派令總兵薩炳阿帶兵駐守四月二十五日有徽甯敗賊

由老西江口等處奔撲縣城知縣曾勉禮登陴守禦
千總藍新恩帶勇迎擊其時薩炳阿已帶兵出城曾
勉禮等因賊衆麕集往請該總兵應援不至該縣城
卽於是日被陷薩炳阿以派防總兵大員賊至未能
堵禦以致縣城失守著卽革職知縣曾勉禮著先行
革職仍責令帶罪自效該總兵等有无退避重情著
德興阿等嚴查叅辦在城文武下落並著查明具奏

其江浦縣城著德興阿翁同書督飭兵勇迅速收復
毋稍延誤

同日胡林翼奏言臣自三月初十日攻破忠和
門外賊壘三座後賊復於長虹橋西倚城之地
乘夜冒雨築壘掘濠因商之李續賓令蔣益澧
等分布洪山等處十五日黎明齊力往攻該逆
抵死抗拒被我軍槍礮轟斃數十名李續賓派

右營移三千斤大礮連日於雙鳳山一帶轟擊賊仍死守相拒二十九日賊由保安門外繞廬嘴關至譚家灣縱火延燒民房李續賓令遊擊劉錫文等率勇往襲賊卽退走劉錫文趙克彰追擊之該逆突出二三千人排列於賽湖隄施放槍礮我軍用劈山礮直前轟擊何紹彩等繞出湖尾邀截賊遂驚潰我軍乘勢衝殺斃賊四

百餘名生擒十五名其小龜山之賊千餘已被
蔣益澧殺退賓陽門亦出賊三四千見賽湖隄
小龜山之賊皆敗遂不敢前李續燾又突起擊
之斃賊數十名賊敗入城四月初一日賊出兩
大股由武勝門賓陽門分路埋伏我軍嚴陣以
待劉錫文率軍擊之斃賊多名蔣益澧趙克彰
等率各營繞擊賊遂驚潰計斃賊二百餘名追

殺至雙鳳山下賊復連施槍礮李續燾率兩營
先待於洪山之北俟其伏出邀截之李續賓復
督親兵用礮轟擊斃賊數十名賊遂狂奔入城
城上礮子如雨恐多傷士卒遂令收隊我軍米
糧軍火厯由石嘴運五里墩以至洪山必由南
湖涸處經過而賊每就近橫阻李續賓等疊次
堵截未嘗稍懈臣與官文楊載福函商力攻武

漢堅城之下徒傷勇士再四思維惟有水陸扼
要斷賊資糧軍火之一法臣因派千總余雲龍
等率勇千餘於下游壇角一帶雕勦以斷賊之
陸運李續賓營駐洪山其地至高可以眺遠見
有大股賊護運卽添兵飛擊之楊載福亦飭水
師參將李成謀等以二營五十二船下紮沙口
斷賊水運四月初八日水師以全隊攻南北兩

岸賊船李成謀等率戰艦下駛行至小河口奮力攻入燒燬賊船五號擊斃淹斃之賊約二百餘名水師駛至青山賊不虞其猝至也兩營一擁而前將賊輜重船隻燒盡斃賊約六七百名賊僅餘六船下竄我軍追之不及至白澣山前始行收隊十六日水師由沙口截擊賊船追至陽邏該逆順流下竄我軍仍回駐沙口所有陸

師把總賀連城鄒友廷文德元水師哨官宋富
源皆係爭先殺賊力戰陣亡均請從優照千總
例議卹現在江流盛漲廣東籌解洋礮已有二
百尊運解來營卽當約會南北水陸各師併力
大戰以圖恢復奏入

上命軍機大臣傳諭官文胡林翼曰覽胡林翼所奏情
形自三月十五至四月十六日已逾一月不過零星

勝仗於克復城池毫無把握該署撫於三月初間疊次奏報均稱旬日之間城池可復又稱春漲初起賊船可以盡燒今已遷延數月始稱水陸扼截斷賊資糧直似從前並未籌及且所稱紮營洪山等處斷賊陸運紮營沙口斷賊水運而四月十六日賊船下駛仍復窮追不及是其布置實未周帀殊負委任官文共事一方亦不聞其互相匡救著卽嚴督水陸各營

合力進攻務將武漢城池剋期攻克若再事遷延朕必治其老師糜餉之罪至於江忠濟陣亡岳州一帶何人扼守本日已諭知駱秉章妥籌布置該督撫亦當豫籌策應不可專恃赴援江西之軍以爲必能掃蕩賊蹤也

上諭內閣曰武昌水陸官軍疊勦獲勝著胡林翼督飭員弁乘勝分擊剋日攻復省城毋再延緩陣亡之把

總賀連城鄰友廷文德元水師哨官宋富源均著從
優照千總例議卹

胡林翼又奏言再查有湖南舉人揀選知縣汪
靜淵向隨湘營當差廉幹有聲經臣委令代辦
咸甯縣事該令汪靜淵率其子汪樹藩汪樹聲
領團擊賊疊有斬擒四月初二日徐逆自江西
糾合義甯武甯大股乘夜來撲汪靜淵偵知先

令其子汪樹藩號召各團援應而親率其子汪樹聲領衆鏖戰奈賊衆我寡汪樹聲奮勇衝鋒身受二十餘傷歿於陣前汪靜淵揮戈直前手刃數賊衝突不出遂亦陣亡及汪樹藩率各團趕至將賊殺退均竄入通城地界適湖南派防岳州道員江忠濟前已分兵駐守通城初二初三等日僞指揮何逆大股由江西義甯回竄江

忠濟力戰兩日踏毀賊壘四座初四日出隊擊
賊新集鄉團人多且囂賊從間道先破鄉團營
壘後路火光頓起該道前敵血戰終日力竭捐
軀所部將弁同時殉難除江忠濟各營員弁官
紳應由湖南巡撫查明請卹外所有代辦咸甯
縣事揀選知縣汪靜淵防剿四月屢立戰功殺
賊衝鋒父子同時殉難志節不虧深堪嘉尚又

查上年九月十月代辦通城縣教諭選補漢陽
府教授熊緒蒲圻縣教諭黎鴻漸候選訓導賀
壽椿候選從九品但懋城王道平均各率團勇
先後殺賊遇害忠義可風請將汪靜淵熊緒賀
壽椿黎鴻漸但懋城王道平照例從優議卹汪
樹聲係六品軍功亦請照把總例優卹奏入

上諭內閣曰湖北代理咸甯縣知縣揀選知縣汪靜淵

於江西逆匪回竄督率紳團疊次擊退該逆復糾合
大股乘夜來撲該知縣率其子六品軍功汪樹聲悉
力鏖戰衆寡不敵同時陣亡殊堪憫惻汪靜淵著交
部從優議卹汪樹聲著照把總例從優議卹至代理
通城縣教諭選補教授熊繡蒲圻縣教諭黎鴻漸候
選訓導賀壽椿候選從九品但懋城王道平於上年
九月十月間帶勇殺賊先後遇害著一併交部從優

議御

同日瑞昌巴彥岱奏言甯國蕪湖賊勢蔓延軍情日迫省城下游在在喫緊杭州及乍浦調來官兵不敷防守臣等與何桂清再四籌商將前次赴衢官兵五百餘員名趕緊調回已於本月十八日全行歸伍臣等卽將此隊官兵飭令於城內暫紮一俟紳民練勇到齊擬再於守城兵

聞

丁內挑選精壯得力者湊足八百名配齊軍火
由臣等酌量統帶相機防勦奏入報

初七日癸亥向榮奏言查小丹陽有賊壘四與朱

門一帶賊股聯絡盤踞數約萬餘意圖內犯經
臣檄令張國樑卽日移軍進攻以固要衝惟聞
金山賊匪糾合瓜州大股竄撲黃泥州煙墩山

營盤經吉爾杭阿督兵截擊急須援應臣當飭
遊擊蔣錫光都司向奎營總薩齡布遊擊李定
太等各帶兵勇拔隊馳往一面催張國樑進攻
小丹陽作速掃除以便調回協勦乃連日進兵
小丹陽迄未得手而疊接吉爾杭阿函稱該逆
長驅內犯另股六七千人由東西山坳衝出衆
寡勢殊官兵挫折四月二十八日吉爾杭阿會

同副都統綱閣督領營總薩齡布參將周兆熊
等管帶馬步隊二千名親往剿辦行至香山口
遙見該逆在煙墩山北黃泥洲南嘯聚築壘虎
嵩林劉存厚等帶隊攻剿將賊築土牆踏平該
逆分股沿山南竄我兵大隊趕到夾攻逆衆立
卽退回不料黃泥洲勇壯三營忽然潰奔致爲
賊陷臣聞信之下復派遊擊李若珠由石埠橋

帶領川黔兵勇五百名馳往應援正在籌商之際突接前任江蘇臬司查文經來稟及臣差弁回營稟報賊自二十八日圍攻煙墩山營盤不退相持至二十九日卯刻撫臣吉爾杭阿受傷殉難綢閣虎嵩林等仍親督各將弁竭力死守至夜賊來愈多營盤旋即被陷綢閣虎嵩林劉存厚周兆熊薩齡布及其餘各官不知下落各

等語伏思吉爾杭阿謀勇兼備在鎮江督勦年
餘屢挫兇燄今以賊困營盤力竭捐軀痛憤之
餘不禁眦裂鎮營爲蘇省屏藩一旦撫臣殉節
遠邇震驚丹陽常州防守空虛若該逆倉猝內
犯大局不堪設想所有京峴九華山各兵勇臣
飛檄余萬清就近統領妥爲鎮撫並札令李定
太等各兵勇暫駐句容飛調總兵明安泰馳赴

橫水橋接統各軍以扼小丹陽秣陵關一面檄
令張國樑選帶精兵二千餘名令福興督往迎
勦如九華山各軍未退卽統軍前進會合嚴加
勦堵惟鎮營勇多兵少設使立腳不住非獨蘇
常危急卽金陵大營亦不免掣動祇有扼據丹
陽先固蘇常門戶一面飛咨德興阿遠派馬步
官兵渡江援應並知會鄧紹良密堵甯國賊股

由紅林橋抽撥勁兵二千名飭交副將秦如虎
由東壩一路馳援以顧後路臣惟有與福興悉
心妥籌仍親督秣陵石埠橋各軍嚴防賊竄以
保全局

同日德興阿翁同書奏言五月初一日接已革
江蘇臬司查文經等稟稱吉爾杭阿於四月二
十八日辰刻帶兵接應高資二十九日黎明遙

見四面賊營吉爾杭阿登牆高望被賊擡槍擊
傷陣亡等語臣等接閱之下不勝駭憤昨據水
師陳國泰呈報南岸之賊撲入鮎魚套口新營
三座我兵退駐煙墩山營盤卽經派撥已革參
將陳昇都司富羣帶固原兵四百名又挑選練
勇六百名飭令趨程渡江馳赴鎮營飛咨已革
提督余萬清俟此項兵勇到日歸其調遣臣等

仍隨時確探南岸情形與向榮會商勦辦
德興阿翁同書又奏言前奉

恩旨准將續到紅單船前幫十隻歸陳國泰經管分布
要隘嗣准向榮咨稱欲將此次上駛之紅單船
撥赴老西江口扼堵囑俟李德麟等所帶舊紅
單船下駛再行飭歸陳國泰調遣臣等查江浦
業經被陷老西江口泊駐師船已屬無及而李

德麟所帶紅單船一時未能下駛現在江北浦
口觀音門等處爲賊船出沒之所近又有逆首
秦曰綱欲從瓜鎮江路竄回金陵之說江北師
船缺乏萬一賊匪竄越恐難抵禦應請

飭下向榮仍遵前

旨將此項紅單船十隻歸江北軍營調遣均奏入

上命軍機大臣傳諭向榮福興怡良曰向榮奏逆賊連

陷黃泥洲煙墩山營盤撫臣殉難德興阿等奏吉爾
杭阿中槍陣亡等語覽奏實深憤懣逆匪糾合瓜鎮
大股南竄黃泥洲煙墩山兩營先後失陷綳閣虎嵩
林等亦不知下落賊勢猖獗已極丹陽常州防守空
虛儻該逆乘勢內犯於大局殊有關繫京峴九華各
兵勇卽著該大臣傳諭余萬清就近統帶相機堵剿
其內犯各路向榮現派李定太等分剿惟蘇常一帶

若專恃向榮派兵援應亦恐鞭長莫及怡良近在常州一切堵剿機宜亟應早爲籌備毋得專恃向榮之軍致滋貽誤江蘇巡撫已命趙德轍署理該督卽與該署撫會商籌辦毋令該逆內犯至金陵大營尤不可輕爲掣動德興阿等奏派已革參將陳昇都司富羣帶兵四百名又選練勇六百名渡江馳赴鎮營此項兵勇到後卽歸余萬清調遣現在江北浦口觀音

門等處賊船出沒且江浦復失情形亦極緊要德興
阿請將此次上駛紅單船歸江北調遣卽著向榮遵
照辦理俟北岸稍清再與德興阿商酌何處喫緊卽
撥往何處截擊

上又命軍機大臣傳諭德興阿翁同書曰賊陷黃泥洲
煙墩山營盤撫臣殉難丹陽句容等處內竄可虞雖
向榮德興阿均各調撥兵勇往援仍當確探南岸情

形會商余萬清辦理所有都司黃彬管帶前幫紅單
船十隻本日業諭向榮等飭歸江北軍營調遣該大
臣務當迅擣瓜州賊壘攻克江浦縣城毋再延緩

上諭內閣曰江蘇巡撫吉爾杭阿由郎中揀發江蘇道
員屢立戰功超擢巡撫懋著勛勤賞加頭品頂戴法
施善巴圖魯名號並令幫辦江南軍務自圍攻鎮江
以來一切布置頗合機宜本年擊勦金陵內竄賊匪

盡力籌防不辭勞瘁方冀恢復堅城正資倚畀乃據
向榮德興阿等同日奏到該撫因勦賊煙墩山登高
瞭望中槍殉難深堪憫惜吉爾杭阿著追贈總督卽
照總督陣亡例賜卹賞給一等輕車都尉世襲罔替
伊子戶部筆帖式文鈺著俟百日孝滿後由該旗帶
領引見用示朕褒嘉忠藎至意

同日曾國藩文俊奏言臣等札調都司黃虎臣

自省督帶三營馳赴吳城協助水師相機攻剿
二月二十二日黃虎臣約會水師後營丁義方
會攻建昌縣城該縣西南兩門臨河我軍半渡
之時賊分三路來迎東西南三門各出賊二千
餘人排列河岸並於隄上包抄勢均兇悍黃虎
臣派李耀南朱邦武等衝擊河洲胡應元帶勇
進擊河岸李大雄帶許志清等直攻隄上水師

亦開礮轟擊朱邦武首先陷陣手刃數賊中槍陣亡各弁勇不少怯退是時哨官許志清被賊矛搥墜馬勢幾不支黃虎臣督各營背水猛戰又有黃再玉馳救許志清得脫須臾轉爲大勝賊衆紛紛敗北我軍追剿殲斃約四百人溺斃無數黃虎臣等指揮環攻水師亦出隊協剿該匪閉城抗拒黃虎臣以逆賊受創膽寒卽與各

營官乘夜攜帶火器前進五更復抵城下四面圍攻李大雄首先登城拋入火彈焚燒賊棚各門亦先後齊登賊突北門敗走我軍一面追剿一面窮搜城內餘匪殺斃數十名城上賊棚概行燒燬當將建昌縣城收復撤隊回省四月初四日復派黃虎臣等營進攻瑞州令市汊水師前往會剿初六初七兩日黃虎臣帶勇赴瑞州

城下擊賊壘有斬擒初八日知府劉于溍遊擊
劉國斌自市汊帶領戰船到瑞會合夾攻該逆
堅守不出水軍泝流上擊賊於南北兩城及中
間石橋上均置大礮水師被礮傷亡甚多劉于
溍黃虎臣等正議再攻忽聞豐城一帶賊乘
虛下竄水師於初九日拔營回赴市汊陸軍亦
於是日拔營回勦奉新該縣距瑞郡六十里黃

虎臣欲乘賊不備輕騎掩襲督率弁勇衝過南
門木橋攻破土壘殺賊二十餘人賊遂退入北
門我軍環繞城下攻擊三時之久城內賊匪蠶
擁而出黃虎臣揮隊回敵賊始退回我軍傷亡
一百餘人仍調回省城駐紮臣等查近省郡縣
爲賊占踞自應逐一勦除以清肘腋之患惟逆
賊長於堅守而兵勇單寡又不能處處圍攻現

將各營調省訓練以期相機攻克近省各城奏
八

上諭內閣曰江西建昌縣城前爲賊匪古踞二月二十
二日官軍水陸進攻斃賊約四百人撲水溺斃者無
數是夜將該城四面圍攻登城焚燒賊棚賊突北門
敗走縣城當卽克復現在黃虎臣等進攻瑞州奉新
等處仍著曾國藩等嚴飭各員弁奮勇進剿次第克

復盡殲醜類

曾國藩文俊又奏言據李元度稟稱三月二十日行抵安仁東鄉交界之江港派哨官賴準發等至東鄉縣城時僞監軍熊近洸僞軍師錢懷榮在城盤踞經賴準發等會同署東鄉縣知縣吳朗各帶兵勇殺賊多名當將東鄉縣克復二十二日鄧輔綸林源恩周鳳山等齊到東鄉與

李元度一軍會合分紮南關外共八千餘人規復撫州撫郡之賊聞官軍將至集黨抗拒二十三日僞指揮李逆率衆三四千人分三路來犯哨官周友勝等奮力衝殺斃悍賊數十名僞官十餘名該逆紛紛潰退追至八里外三石橋溺死之賊又數百人逃賊在民房解甲傳餐兵勇圍剿復殺三百餘名當斬僞指揮李逆並殺黃

馬褂僞官一名計鄧輔綸林源恩一軍殺賊六
百餘名李元度一軍斬馘三百餘名共生擒一
百七名奪獲旗幟軍器無算二十五日官軍進
紮汀橋距撫州郡城十里定議越日大舉二十
七日林源恩乘霧進攻橫街口賊營該逆增柵
踞濠勢極堅固守備周友勝等率勇直前開礮
轟擊礮子落賊藥桶賊營火起各軍乘勢殺入

焚勦殆盡橫街口一營旣破遂分攻正覺寺兩
營耿光宣李晉發等攻其左彭斯舉等攻其右
縱火焚燒兩營相繼攻破維時左直街賊營已
爲彭斯舉等所圍先鋒唐廷健等及周鳳山之
勇左馳右突殲賊立盡其河東灣賊營經吳齊
源等繞道圍攻該逆閉門轟礮死拒哨官賴準
發首先攻入童梅華等各放噴筒燃燒殲賊千

計文昌橋以東五營一時盡破轟殺及溺斃之賊約共五六千人生擒百餘人奪獲大礮擡槍刀矛旗幟等物一千四百餘件我軍亦有傷亡賊之在城內者阻水爲固以巨礮橫截文昌橋我軍因移營南城外之千金坡擬從上游搭橋過渡四月初二日李元度督勇綰搭浮橋城內二三千賊分股來撲鄧輔綸林源恩周鳳山等

分三路抄擊追至文昌橋畔逆黨鼠伏亭中相持甚久李元度令左營新中營乘隙飛渡城東各營聞渡河之師已畢始從文昌橋收隊是日楚師直偪城下與江軍夾河而營次日全軍畢渡同紮五里塘初四日鄧輔綸等各率所部分攻西南北三門斃賊約二百名我軍受傷者亦有二百餘人初九日進紮西南隅距城止半里

許該逆出城分撲各營且紮且戰殺賊七八十
名賊遂閉城拒守李元度步步爲營與鄧輔綸
林源恩之師會合進逼撫郡連破賊營晝夜環
攻士卒洵屬用命惟城內悍賊堅守如故而建
昌瑞臨之匪猶復伺隙來援臣等現派水陸兩
營扼紮李家渡地方以絕逆黨接應之路仍飭
各軍奮力克復要郡先清東路奏入

上諭內閣曰逆匪竄踞江西撫州府及東鄉縣城李元
度等由江港地方進剿直抵東鄉縣城疊有斬擒將
縣城克復三月二十二二十五二十七等日將撫州城
外文昌橋以東賊立五營盡行燒燬斃匪共五六千
人生擒百餘人奪獲軍械千餘件著曾國藩文俊飭
令李元度等督率兵勇迅圖克復郡城聚殲醜類

初八日甲子胡林翼奏言查逆賊戰船分布武漢

者漢陽東門南門至南岸嘴一帶約停泊二百餘號武昌城外鮎魚套壇角等處亦各有十號永不啟旋每船密排礮位外以大鐵練繫大木鐸依附之翼以梗塞我船不得相近臣與楊載福密籌火攻之具逐一周備每火船用勇士二十人駕之附一三板偪近賊船拋錨下旋始行燃綫舉火卽躍入三板之中有未近賊船而先

舉火者斬之又豫製檣竿淫架百具分豎於船以避賊蔽四月二十五日楊載福添派遊擊鮑超之營下勦適李成謀周清元追擊賊船溯流而上燒燬賊船甚多斃賊無算其棄船登岸之賊悉爲北岸都統都興阿馬隊所殲無一脫者二十八日南風大起令參將張啟基等四營出隊作接應之兵楊載福卽親督遊擊王明山等

七營帶火船五十餘號順風揚帆蔽空而下直抵漢陽東門南門上下圍裏我軍勇士斫斷木簞鐵練偪近賊船賊見我船猝至倉卒無措開礮抗拒僅中於蘆葦深處及積薪涇絮之中而火船緊偪霎時火起槍礮齊發所有漢陽一帶賊船二百餘號燒燬淨盡燒斃溺斃之賊無算並延燒漢陽江岸陸賊營壘是日臣豫派李續

賓等東路中路及石嘴沌口各營四面分攻保
安門望山門青山壇角窩灣等處並以大隊五
千人循江岸以護水師午刻火微而賊船亦盡
我軍始收隊四月十一日曾國華等已至崇陽
聞江西義甯州賊匪回竄湖南防兵在通城失
利道員江忠濟陣亡僞指揮何逆將復竄蒲圻
以阻江西援軍曾國華遂率各軍間道趕至蒲

圻二十日何逆果至不虞我援軍之猝遇也二十
十一二十二連戰兩日大勝之轟斃騎馬黃衣
賊目二名餘賊擊斃無算臣已函飭曾國華迅
速追勦崇通直達義甯現在水陸之賊僅餘武
昌城下鮎魚套賊船二十隻以四營水師扼之
賊可待斃楊載福已駛往沙口探報黃州府一
帶新從湖口小池口調到賊船三百餘號因沙

口已駐水師不敢上犯楊載福卽日率領六營
下駛可一鼓殲除也此次賊船焚燬殆盡水賊
已無能爲其漢陽接濟久斷武昌南路中路均
已扼截無隙可乘惟下游之筧灣青山一綫江
隄尙有小路可通臣與李續賓派兵一千餘名
上下梭巡賊勢實已窮蹙臣嘗文所派弁兵搜
獲賊匪僞報據稱各路援賊期以前後夾擊臣

營及李續賓洪山之營而大冶武昌各官紳探報亦同臣等密商即使四路齊撲亦可努力決戰不致別有貽誤奏入

上命軍機大臣傳諭官文胡林翼曰胡林翼奏水師火攻連獲大勝漢陽江岸賊船已盡焚燬援軍中途勦賊亦獲勝仗辦理尙屬得手其自鮎魚套至黃州一帶賊船三百餘隻卽著楊載福乘勝痛加勦洗勿令

上竄官文總統全師胡林翼圍攻武昌亟應乘此聲
威迅圖攻克二城著該大臣等嚴飭各軍振刷精神
水陸合勦以期及早奏功至搜獲該匪僞文有糾約
援賊夾擊官兵營盤之語並著加意嚴防毋墮奸計

同日

上諭內閣曰余萬清著補授雲南鶴麗鎮總兵仍留鎮
江統帶官兵督辦防勦事務

同日德興阿翁同書奏言前派援兵千名渡江
助勦竊慮九華山大營挫失一面籌添步隊及
練勇往援一面飛檄水師總兵泊承陞周士法
嚴紮南岸各口出江船隻暫令收泊北岸以固
藩籬初二日據探九華山大營已爲賊踞臣等
卽將籌添之河州兵三百五十餘名派總兵李
志和統帶練勇四百名派參將毛三元統帶飭

令兼程渡江其前此所派兵勇一千名亦歸該
二員分帶會同余萬清妥商勦辦又據逃出難
民供稱賊匪意圖侵踞句容丹陽再行分股渡
至江北由沙頭杭家集竄往仙女廟邵伯鎮等
情現飭各營設法堵禦加意嚴防

德興阿翁同書又奏言揚營步隊從前懸缺未
補及陣亡潰散者共三千七百餘名較原額計

短四分之一所有奉

旨續撥各兵惟山東兵已到九百名其羅玉斌所帶直隸宣化兵均爲徐州截留屢催罔應至馬隊一項馬匹倒缺過半近因緊攻江浦先後添撥馬步隊一千餘名共計現駐浦口者將及四千名茲又兩次酌撥兵勇一千七百餘名赴南岸援剿以致存營之兵益形單薄籲乞

天恩飭下邵燦庚長仍遵前

旨將直隸宣化兵一千三百名吉林黑龍江馬隊餘丁
一千名均催令全數來揚俾敷勦辦奏入

上命軍機大臣傳諭德興阿翁同書邵燦庚長曰逆黨
連陷黃泥洲煙墩山盤營復將九華山大營占踞意
在窺伺句容丹陽圖擾蘇常一帶官軍新挫余萬清
初領各軍未知能否得力雖有李定太等兵勇駐紮

句容等處而東南大局已不免掣動德興阿等所派李志和等分帶兵勇著卽飭令與余萬清等會商剿辦以固蘇常門戶瓜州未復鎮江又復失利逆黨欲竄江北該大臣當飭各營加意嚴防勿令江南賊匪與瓜州連爲一氣此時揚營兵力甚單所有直隸宣化兵一千三百名著邵燦庚長卽令全數速赴揚州交德興阿等調遣其吉林黑龍江馬隊餘丁一千名

該漕督等仍遵前旨分撥一半赴揚協勦不得任聽
徐州截留致有貽誤